



IKINYAMAKURU K'IMIHINDAGURIKIRE Y'IKIRERE N° 25, KIGENEWE

ABAHINZI- BOROZI IGICE CYA MBERE NZERI (01-10), 2020

Cyasohtse ku itariki ya 13 Nzeri 2020

Incamake

Mu minsi icumi y'igice cya mbere, Nzeri 2020 kuva tariki ya 1 kugeza tariki ya 10, byagaragaye ko isangano ry'imiyaga rigenda ryegera akarere u Rwanda ruherereyemo cyane cyane mu Majyaruguru y'igihugu cyacu, ibi bikazatuma imvura ikomeza kwiyongera. Imvura iri mu kigereranyo cy'impuzandengo y'imvura isanzwe igwa yapimwe mu Majyaruguru ndetse n'Iburengerazuba naho imvura iri munsu y'impuzandengo yisanzwe igwa yapimwe Iburasirazuba, mu Mujyi wa Kigali n'igice cy'Amajyepfo ahagana iburasirazuba. Igiteranyo cy'mvura nyinshi yapimwe mu Ntara y'Amajyaruguru ku bupimiro bwa Kinigi hapimwe milimetero 85.9 mu minsi ine na Butaro hapimwe milimetero 80.5 mu minsi itatu naho mu Ntara y'Iburengerazuba ku bupimiro bwa Ntendezi hapimwe milimetero 76 mu minsi ine. Ahapimwe imvura nke ni ku bupimiro bwa Mpanga (0.3mm), Ruhuha (0.4mm) na Kaduha (0.7mm).


Ibipimo by'ubushyuhe ni nk'ibisanzwe mu gice cya mbere cya Nzeri, igipimo cy'ubushyuhe bwo hejuru cyari hagati ya dogere Selisiyusi ($^{\circ}\text{C}$) 21.5 muri Gicumbi ndetse na dogere Selisiyusi 31.8°C muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya 11.6°C muri Musanze ku bupimiro bwa Busogo na 19.0°C ku bupimiro bwa Bugarama. Ubuhehere bw'ubutaka bwariyongereye bituma imirimo y'ubuhinzi n'ubworozi nko gutegura ubutaka ndetse no gutera imbuto bigenda neza kandi bikazanakomeza no mu minsi icumi iri imbere.

1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhere bw'ubutaka mu minsi icumi y'igice cya mbere cya Nzeri 2020.

1.1. Ingano y'imvura yaguye

Ikarita ya mbere hasi irekana ingano y'imvura yaguye mu minsi icumi y'igice cya mbere cya Nzeri 2020. Muri iki gice cya mbere imvura yapimwe yari nke mu bice byinshi by'igihugu uretse ku bupimiro bwa Kinigi, Butaro na Ntendezi hapimwe imvura iri hejuru y'imvura isanzwe ihagwa. Igiteranyo cy'imvura ingana na milimetero 85.9 yapimwe ku bupimiro bwa Kinigi mu minsi ine ikaba ari nayo yari nyinshi, naho iyabaye nke yari muni ya milimetero 1, ikaba yarabonetse ku bupimiro bwa Mpanga, Kaduha na Ruhuha.




Ikarita ya 1: Ingano y'Imvura yaguye mu gice cya mbere cya Nzeri 2020

1.2 Impuzandengo y'imvura isanzwe igwa mu minsi icumi y'igice cya mbere cya Nzeri

Ufatiye ku bipimo by'igihe kirekire, ikarita ya kabiri iratwerekana imvura isanzwe igwa mu minsi icumi y'igice cya mbere cya Nzeri. Ubusanzwe igice cya mbere cya Nzeri kigusha imvura iri hagati ya milimetero 13.1 na 55.8;


bigaragara ko ugereranyije imvura yaguye n'isanzwe igwa mu gihe kirekire, imvura yabaye nke mu bice by'Iburasirazuba no mu mujyi wa Kigali, naho mu Majyaruguru n'Iburengerazuba imvura yaguye yari mu kigero cy'isanzwe igwa henshi muri ibyo bice.



Ikarita ya 2: Imvura isanzwe igwa mu gice cya mbere cy'ukwezi kwa Nzeri

1.3. Umubare w'iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya mbere mu kwezi kwa Nzeri 2020. Umunsi tubara ko wagushije imvura ni uwapimweho byibuze milimetero 0.85 cyangwa nyinshi. Muri iki gice nibura ahantu henshi hagushije imvura mu minsi ibiri uretse ku bupimiro bwa Kaduha, Ruhuha na Mpanga hataguye imvura ihagije ku minsi. Iminsi myinshi yabaye hagati y'iminsi itatu n'iminsi ine (3-4).



Ikarita ya 3: Umubare w'iminsi imvura yaguyemo

1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya mbere cya Nzeri 2020 bwariyongereyeho gake bitewe n'ubwiyongere bw'ibicu mu kirere ndetse n'imvura nke yabonetse. Hateganyijwe ko ubuhehere bw'ubutaka buzakomeza kwiyongeraho mu gice cya kabiri cya Nzeri bitewe n'uko ibihe by'imvura bizakomeza kwiyongera.


2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

2.1 Iyipimo cy'ubushyuhe bwo hejuru

Ikarita ya 4 irerekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigerero cy'impuzandengo y'igihe kirekire; mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi.


Mu Ntara y'Amajyaruguru n'iy'Amajyepfo akaba ariho hakonje ugereranyije n'ahandi mu gihugu. Ibipimo by'ubushyuhe byari hagati ya dogere Selisiyusi 21.5 na 28.8 ahenshi mu gihugu; uretse ku bupimiro bwa Bugarama hashyushye cyane hapimwe dogere selisiyusi 31.8.



Ikarita ya 4: Ubushyuhe bwo hejuru

2.2. Iyipimo cy'ubushyuhe bwo hasi

Ikarita ya gatanu irerekana uko ubushyuhe bwo hasi bwanganaga. Ubushyuhe bwo hasi bwari hagati ya Dogere Selisiyusi 11.6°C (Busogo) na Dogere Selisiyusi 19.0°C mu Bugarama. Mu Majyaruguru y' u Rwanda niho hakonje cyane kurusha ahandi mu gihugu.




Ikarita ya 5: Ubushyuhe bwo hasi

3.0 Iteganyagihe rigenewe abahinzi mu minsi icumi y'igice cya kabiri cya Nzeri (tariki 11-20) 2020

3.1 Ikirere giteganyijwe

Mu gice cya Kabiri cy'ukwezi kwa Nzeri (hagati y'italiki ya 11 niya 20) mu Rwanda hateganyijwe kugwa imvura iri hagati ya milimetero 0 na 60mm. Imvura nke iri munsu ya milimetero 15 iteganyijwe henshi mu ntara y'Iburasirazuba mu turere twa Gatsibo, Kayonza, Kirehe, Ngoma na Bugesera, mu ntara y'Amajyepfo mu turere twa Huye, Gisagara, Nyanza, Ruhango, amajyepfo ya Muhanga na Kamonyi no mu burasirazuba bwa Nyamagabe na Nyaruguru. Imvura iri hagati ya milimetero 45 na 60 iteganyijwe mu turere twa Rubavu, Burere, igice gito cya ruguru ya Gicumbi, igice cya Nyabihu, Rutsiro na Nyamasheke mugihe imvura iri hagati ya milimetero 35 na 45 iteganyijwe muri Musanze, igice gisigaye cya Nyabihu, Nyamasheke, Rutsiro, igice cy'iburengerazuba cya Ngororero, Karongi, Nyagatare n'amajyaruguru ya Gakenke, Gicumbi na Rulindo. Ahasigaye hose mu gihugu hateganyijwe imvura iri hagati ya milimetero 15 na 35 nkuko bigaragazwa n'ikarita iri hasi.

Imvura iteganyijwe kugwa hagati y'italiki ya 12 na 18 mduce dutandukanye tw'igihugu. Imvura izaturuka ku isangano ry'imiyaga rigenda ryegera akarere u Rwanda ruherereyemo kandi ikazaba iri ku kigero cy'impuzandengo y'imvura isanzwe igwa muri iyi minsi icumi y'ukwezi kwa Nzeri.



Ikarita ya 6: Iteganyagihe ry'imvura mu gice cya kabiri cya Nzeri 2020.

3.2 Ibirebana n'imirimo y'ubuhinzi

Inzego z'ubuhinzi ziragirwa inama yo kwihutisha imirimo yo gutegura imirima, kwihutisha kugeza inyongeramusaruro ku bahinzi, guterera ku gihe no gutegura ibikoresho byifashishwa mu mirimo yo kuhira cyane cyane mu bice bikunze kugira imvura idahagije ndetse no kwita ku mihingire ibika amazi mu butaka. Muri iki gice cya kabiri imirimo izibandwaho cyane ni iyo gutera imbuto zitandukanye. Abahinzi barashishikarizwa gukomeza kugisha inama abashinzwe ubuhinzi babegereye mu gukomeza gutegura neza imirimo ijyanye n'ubuhinzi. Barashishikarizwa kandi kujya basura urubuga rwa Meteo Rwanda www.meteorwanda.gov.rw, cg guhamagara umurongo utishyurwa 6080.